

Канон молебный ко Пресвятой Богородице,

поемый во всякой скорби душевной и обстоянии

Глас 8-й

Песнь 1

Ирмос: Воду прошэд яко сущу, и египетскаго зла избежав, израильтянин вопияше: Избавителю и Богу нашему поим.

Припев: Пресвятая Богородице, спаси нас.

Многими содержимь напастьми, к Тебе прибегаю, спасения иский: о Мати Слова и Дево, от тяжких и лютых мя спаси.

Пресвятая Богородице, спаси нас.

Страстей мя смущают прилози, многого уныния исполнити мою душу; умири, Отроковице, тишиною Сына и Бога Твоего, Всенепорочная.

Слава: Спаса рождшую Тя и Бога, молю, Дево, избавитися ми лютых: к Тебе бо ныне прибегаю, простираю и душу и помышление.

И ныне: Недугующа телом и душою, посещения Божественнаго и промысления от Тебе сподоби, едина Богомати, яко благая, Благого же Родительница.

Песнь 3

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, едина Человеколюбче.

Пресвятая Богородице, спаси нас.

Предстательство и покров жизни моей полагаю Тя, Богородительнице Дево: Ты мя окорми ко пристанищу Твоему, благих виновна, верных утверждение, едина Всепетая.

Пресвятая Богородице, спаси нас.

Молю Дево, душевное смущение и печали моей бурю разорити: Ты бо, Богоневестная, начальника тишины Христа родила еси, едина Пречистая.

Слава: Благодетеля рождши добрых виновнаго, благодения богатство всем источи, вся бо можеша, яко сильного в крепости Христа рождши, Богоблаженная.

И ныне: Лютыми недуги и болезненными страстими истязаему, Дево, Ты ми помози: исцелений бо неоскудное Тя знаю сокровище, Пренепорочная, неизживаемое.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стеной и предстательству.

Призри благосердием, всепетая Богородице, на мое лютое телесе озлобление, и исцели души моей болезнь.

Седален, глас 8-й

Яко всенепорочная Невесто Творцу, яко неискусомужная Мати Избавителя, яко приятелище сущи Утешителя всепетая, беззаконию мя суща скверно жилище, и бесом игралище в разуме бывша, потщися и сих злодействия мя избавити, светло

жилище добродетельми соделавши, светодательная и нетленная: разжени облак страстей, и высшего причастия сподоби, и света невечернего молитвами Твоими.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Пресвятая Богородице, спаси нас.

Страстей моих смущение, кормчию рождающая Господа, и бурю утиши моих прегрешений, Богоневестная.

Пресвятая Богородице, спаси нас.

Милосердия Твоего бездну призывающую подаждь ми, Яже Благосердаго рождающая и Спаса всех поющих Тя.

Пресвятая Богородице, спаси нас.

Наслаждающаяся, Пречистая, Твоих дарований, благодарственное воспеваем пение, ведуще Тя Богоматерь.

Слава: На одре болезни моея и немощи низлежащу ми, яко благолюбива, помози, Богородице, едина Приснодево.

И ныне: Надежду и утверждение, и спасения стену недвижиму имуще Тя, Всепетая, неудобства всякаго избавляемся.

Песнь 5

Ирмос: Просвети нас повеления Твоими, Господи, и мущею Твоею высокою Твой мир подаждь нам, Человеколюбче.

Пресвятая Богородице, спаси нас.

Исполни, Чистая, веселия сердце мое, Твою нетленную дающи радость, веселия рождающая Виновнаго.

Пресвятая Богородице, спаси нас.

Избави нас от бед, Богородице Чистая, вечное рождающая избавление, и мир, всяк ум преимуший.

Слава: Разреши мглу прегрешений моих, Богоневесто, просвещением Твоея светлости, Свет рождающая Божественный и превечный.

И ныне: Исцели, Чистая, души моя немощение, посещения Твоего сподобльшая, и здравие молитвами Твоими подаждь ми.

Песнь 6

Ирмос: Молитву пролию ко Господу, и Тому возведу печали моя, яко зол душа моя исполнися, и живот мой аду приближися, и молюся яко Иона: от тли, Боже, возведи мя.

Пресвятая Богородице, спаси нас.

Смерти и тли яко спасл есть, Сам Ся издав смерти, тлением и смертию мое естество ято бывшее, Дево, моли Господа и Сына Твоего, врагов злодействия мя избавити.

Пресвятая Богородице, спаси нас.

Предстательницу Тя живота вем и хранительницу тверду, Дево, и напастей решащу молвы, и налоги бесов отгоняющую; и молюся всегда, от тли страстей моих избавити мя.

Слава: Яко стѣну прибѣжища стяжахом, и душъ всесовершенство спасѣние, и пространство в скорбѣх, Отроковице, и просвѣщеніем Твоимъ присно радуемся: о Владычице, и нынѣ нас от страстей и бедъ спаси.

И нынѣ: На одрѣ нынѣ немощствуяй лежу, и несть исцелѣнія плоти моеѣ; но, Бога и Спаса миру и Избавителя недуговъ рождающая, Тебе молюся, Благой: от тли недуговъ возстави мя.

Спаси отъ бедъ рабы Твоѣ, Богородице, яко вси по Бозе к Тебе прибегаемъ, яко нерушимей стѣнѣ и предстательству.

Призри благосердіемъ, всепетая Богородице, на мое лютое телесе озлобленіе, и исцели души моея болѣзнь.

Кондак, глас 6-й

Предстательство христіанъ непостыдное, ходатайство ко Творцу непреложное, не презри грѣшныхъ молѣній гласы, но предвари, яко благая, на помощь насъ, верно зовущихъ Ти: ускори на молитву, и потщися на умоленіе, предстательствующи присно, Богородице, чтущихъ Тя.

Пѣснь 7

Ирмос: Отъ Иудейи дошедше отроцы, в Вавилонѣ иногда, верою Троицкою пламеньъ пещныйъ попраша, поюще: отцевъ Божѣ, благословенъ еси.

Пресвятая Богородице, спаси насъ.

Наше спасеніе якоже восхотѣлъ еси, Спасе, устроить, во утробу Девы вселился еси, Юже миру предстательницу показалъ еси: отецъ нашихъ Божѣ, благословенъ еси.

Пресвятая Богородице, спаси насъ.

Волителя милости, Егоже родила еси, Мати чистая, умоли, избавитися отъ прегрешеній и душевныхъ сквернъ, верою зовущимъ: отецъ нашихъ Божѣ, благословенъ еси.

Слава: Сокровище спасенія и источникъ нетленія, Тя рождающую, и столпъ утвержденія, и дверь покаянія, зовущимъ показалъ еси: отецъ нашихъ Божѣ, благословенъ еси.

И нынѣ: Телесныя слабости и душевныя недуги, Богородительнице, любовью приступающихъ къ крову Твоему, Дево, исцелити сподоби, Спаса Христа намъ рождающая.

Пѣснь 8

Ирмос: Царя Небеснаго, Егоже поютъ вой Ангельстии, хвалите и превозносите во вся вѣки.

Пресвятая Богородице, спаси насъ.

Помощи, яже от Тебѣ, требующия не презри, Дево, поющия и превозносящия Тя во вѣки.

Пресвятая Богородице, спаси насъ.

Неможѣние души моея исцеляеши и телесныя болѣзни, Дево, да Тя прославлю, Чистая, во вѣки.

Слава: Исцеленій богатство изливаеши верно поющимъ Тя, Дево, и превозносящимъ неизреченное Твое рождество.

И нынѣ: Напастей Ты прилоги отгоняеши и страстей находы, Дево: темже Тя поемъ во вся вѣки.

Песнь 9

Ирмос: Воистинну Богородицу Тя исповедуем, спасеннии Тобою, Дево чистая, с безплотными лики Тя величающе.

Пресвятая Богородице, спаси нас.

Тока слез моих не отврати, Яже от всякаго лица всяку слезу отъемшаго, Дево, Христа рождающая.

Пресвятая Богородице, спаси нас.

Радости мое сердце исполни, Дево, Яже радости приемшая исполнение, греховную печаль потребляющая.

Пресвятая Богородице, спаси нас.

Пристанище и предстательство к Тебе прибегающих буди, Дево, и стена нерушимая, прибежище же и покров и веселие.

Слава: Света Твоего зарями просвети, Дево, мрак неведения отгоняющая, благоверно Богородицу Тя исповедующих.

И ныне: На месте озлобления немощи смирившагося, Дево, исцели, из нездравия во здравие претворяющая.

Молитвы ко Пресвятой Богородице

Царице моя преблагая, надеждо моя Богородице, приятелище сирых и страннных предстательнице, скорбящих радости, обидимых покровительнице! Зриши мою беду, зриши мою скорбь: помози ми яко немощну, окорми мя яко странна. Обиду мою веси, разреши ту, яко волиши: яко не имам иных помощи разве Тебе, ни иных предстательницы, ни благия утешительницы, токмо Тебе, о Богомати, яко да сохраниши мя и покрыеши во веки веков. Аминь.

К кому возопию, Владычице? К кому прибегну в горести моей, аще не к Тебе, Царице Небесная? Кто плач мой и воздыхание мое примет, аще не Ты, Пренепорочная, надеждо христиан и прибежище нам грешным? Кто паче Тебе в напастех защитит? Услыши убо стенание мое, и приклони ухо Твое ко мне, Владычице Мати Бога моего, и не презри мене, требующаго Твоея помощи, и не отрини мене грешнаго. Вразуми и научи мя, Царице Небесная; не отступи от мене раба Твоего, Владычице, за роптание мое, но буди мне Мати и заступница. Вручаю себе милостивому покрову Твоему: приведи мя грешнаго к тихой и безмятежной жизни, да плачуся о гресех моих. К кому бо прибегну повинный аз, аще не к Тебе, упованию и прибежищу грешных, надеждою на неизреченную милость Твою и щедроты Твоя окривляемь? О Владычице Царице Небесная! Ты мне упование и прибежище, покров и заступление и помощь. Царице моя преблагая и скорая заступнице! Покрой Твоим ходатайством моя прегрешения, защити мене от враг видимых и невидимых; умягчи сердца злых человек, возстающих на мя. О Мати Господа моего Творца! Ты еси корень девства и неувядаемый цвет чистоты. О Богородительнице! Ты подаждь ми помощь немощствующему плотскими страстьми и болезнующему сердцем, едино бо Твое и с Тобою Твоего Сына и Бога нашего имам заступление; и Твоим пречудным заступлением да избавлюся от всякия беды и напасти, о Пренепорочная и Преславная Божия Мати Марие. Темже со упованием глаголю и вопию: радуйся, благодатная, радуйся, обрадованная, радуйся, преблагословенная, Господь с Тобою.